

Politik ver en haus, naia kritern ont hilf ver de zins en gònze Trentin

Gem omport en de neat za gem hilf ver de zins ont bècksln de sèlln ver de haiser gamòcht ver de politik ver en haus pet òndra virm as kemmen gem en gònze trentiner lònt. S ist bos as sok de ausrot vourtroug van assessor en de politik ver en haus, Simone Marchiori u'ganòmmen en vrait as de 10 van heibeger va de Provinzaljunta. De mosnemm ist noat ver za versichern de provinzhilf ver de ausònder òrbetn ver iaz ont ver de zukunft, abia s vernaiern van haiser ver za verzinsn ont de projektn ver za gem bèrt en de derver as reskiarn za kemmen verlòk. Der asesor hòt tsòk as se belln asou a struktural ont oa'zege omport gem en gònze Trentin bavai de neat ver za hom a haus en zins pet minder gèlt kearn nea'mer lai en de groasn stòttn. Ber hom aussertschauk

de gònze lòntschòft ont ber tea' schutzn s bider gea' za lem en de derver as mear aus sai', asou za gem de moglechkait za giltn, pet an glaichen strument, de insertn sozialpolitik". Finz hait, de heachestn kost van zins sai' gaben galeikt lai ver de 12 greasestn gamoa'n as sai' Ala, Arco, Burg, Cles, Lavis, Leive, Mezzolombardo, Mori, Persn, Riva del Garda, Rovereto ont Trea't. Pet en doi akt, ver za gem omport en de noatekait za meing hom hilf ver de zinsn en òndra lander aa, kemmen gem de glaichen bèrt ver òlla de Gamoa'n va de provinz, ont derzua bou as noat ist kemmen galeikt ausòndra bècksln ver de derver as aus van zentrum sai'. De zboate bichte naiekait ist as en prauchen va de kommerzial plòtt (as derzua hòltet de mauern, de metre dernem ont de ausbendegen plòtzn) abia



DIDA: arkif BKI

naï kritern ver za zeiln de metre en plòtz va vourher. Ver za gem de meareste sicherkait, de nain heachestn zinsn, ver de ziviln haiser as nai oder

guat gahòltn sai', sai' kemmen ganòmmen no en de datn van Drauschauer van Haiser (OMI), van Staieromt, va drucker as gilte sai' ont van oa'nekaitn as

sai' van lònt, kemmen gamòcht turch an bisschòftn metode u'ganòmmen dirèckt van ISPAT (Istitut ver de Statistik va de Provinz va Trea't). Ver de doi naiòrbet praucht men nèt gèlt vort leing asn provinzalbilanz. Va de doi mosnemm ist kemmen earst vourklòfft en CAL, ont asou ist kemmen u'ganommen de oa'nekait van pirgermoastern ver de òrbet ont ver de virm as praucht kemmen sai'.

S beirterpuach:
Assessor en de politik ver en haus: assessore alle politiche Drauschauer van Haiser: Osservatorio del Mercato Immobiliare der Staieromt: Agenzia delle Entrate
Istitut ver de Statistik va de Provinz va Trea't (ISPAT): Istituto di Statistica della Provincia di Trento)

Zoa', korb, packl: kurza gshichtn va baiber as en be

No s puach Le maestre, de Rosanna Cavallini keart um za kòntarn s lem ont de òrbetn van baiber va doing jor pet en puach "Zoa', korb, packl". Dòs nai puach klòfft van baiber as va òrbet sai' sa gòngen za hòndln. S puach mòcht an unterschied zbischn de baiber as verkaft hom dinger no de ben ont de seng baiber as gòngen sai' vort za òrbetn. De Cìode ont de baiber as tettñ hom de kinder van òndern, zan paispil, hom nicht verkaft, ober de hom u'trong s sai' laib ont s sèll as de guat

gaben sai' za tea'. De doing baiber sai' toal kemmen van an fenomen va ausbònder as bòlten gami't hòt de sozialet gschicht va mearer gamoa'schòftn. Durch untersuachn, kuntschòftn ont gschichtn van lait, s puach Zoa', korb, packl gip lai bider stimm en de doing baiber no de ben, as guat gaben sai' za mòchen auser kemmen van a neat eppes guats. Dòs puach ist schea' tschrim ont pòckt vort, s bill nèt sai' lai a gaschenk en de òrbet van baiber as vort va haus gòngen sai' za hòndln, ober s ist gor eppes bichte



ver òlla za tea' nèt vergèssn s sèll as gaben ist.

S hòndln van krumer va der bersntoler gamoa'schòft ist gaben an òrbet as hom envir trong s mearest lai de mander. S hòt gahòt gor an ettlena baiber schubet no en zvaite

bèltkriag, benn as de ermeket hòt se mear galòt hearn, as gòngen sai' en de sudtiroler telder za hòndln. Der treff hòt se gahòltn en eirta as de 14 van heibeger um òchta ont a hòlbs zobenz kan Filzerhof en Vlarotz. De schraiberin hòt klòfft per de viareren van Bersntoler Kulturinstitut Claudia Marchesoni. Zòmmen pet de vourstell van puach hòt men sechen gameicht s toal va de austell "Zbischn gschichtn ont birkleckkait. Giuseppe Šebesta ont s Bersntol" as ist kemmen augarichtn as de teitsch van museum Filzerhof.

Sea va Hardimbl: konzert

Morng vria, um oa'dleva, kan Sea va Hardimbl bart se hòltn der konzert va pianoforte va Michele Castaldo. De iniziatif ist tsbunnen abia an vurm ver za lissn guata musik en de schea'nekait van insertn pèrng. De kimm gamòcht gèltsgott en de Orchestra Giovanile Trentina, de pònk Hoa Valzegu', de Region Trentino Sudtirol, deTolgamao'schòft ont de lokaln omtn. S toalnem ist vrai ont pet scheiles bètter der konzert bart nèt gamòcht kemmen.

De Gamoa' va Garait, kamaròtt van pain

Pet en gamoa'ausrot numer 25 va de 3 van heibeger, de gamoa' va Garait nimmp toal en nètza van gamoa'n kamaròttñ van pain.

Šebesta en Bersntol

Hai't um òchta ont a hòlbs kan òltn eiven va de Acqua Fredda, bart se hòltn an treff zòmmpuntñ pet de austell "Šebesta en Bersntol, zbischn gschichtn ont birkleckkait - Giuseppe Šebesta ont s Bersntol". S sai' de treffen "Lesn ont gschichtn" bo de lait vinnen se za lissn tèckstñ van entograf zòmñ pet de musik. Men geat za sechen der museum aa. Der treff ist kemmen organisart zòmñ pet en Omt va de arkeologische pahalter ont van omt ver de kulturaln pahalter va de Provinz va Trea't.

Prais Kentzeboghes 2026

De vraischòft Babel ont òndra vriaschòftn va de Sardegna orgnisiart de nai'nte edizion van prais KENTZEBOGHES as hòt der zill za gem bèrt en filmen en de sprochen minder kennt van Balschlònt ont iberhaup va de Sardegna. Der prais ist an konkurs ver filmen en de sprochen as kemmen understitzt van Gasetz 482 van 1999 abia de inser. Der konkurs ist toalt en zboa toaln: en de earste nemmen toal lai de filmen en de sprochen va de Sardegna, en ònder de filmen en òlla de sprochen minder kennet van Balschlònt. De produktñ sai' kurza filmen oder dokumentarn as klòffen almen s 60% en de lokal sproch. S toalnem ist



omensist. De prais sai' de doin: ver de earste kategori, der earste bart krieg draitaustr euro, der zboate bart krieg teknischn dinstn van bèrt va draitaustr euro, der dritte bart krieg an prais va zboataustr euro ont der prais RTS ist va tausnt euro.

De sèlln as sai' enteressart za nemmen toal miasn auvilln der model as menn vint as de internetsait <https://www.babeltv.org/editzione-2026>. Men hòt zait finz as de earsrte van schanmikeal ver za schraim se inn. Zòmñ pet en film mias men derzualeing a

paschraibung van film, der ekonomische plan ont òndra dokumentn. S hòt a praisgericht as schauk aus de filmen ont as gip aus de prais. En praisgericht sai' drinn: de viarer van drai zentum va kulturl dinstn va de Sardegna, der viarer va de Società Umanitaria ont

òndra auskennlait. De filmen as barn toalnemmen en doi konkurs, barn kemmen vourstellt bail en konkurs van an ònders jor. Ver òndra informazonen mu men sechen de internetsait van konkurs.

LORENZA GROFF